

● ● ● ● ●

● ● ● ● ●

思
陵
典
禮
紀

孫承澤
著

中
華
書
局

叢書集成初編

思陵勤政紀（及其他一種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

思陵典禮紀

叢書集成初編所選借月
山房彙鈔澤古齋重鈔皆
收有此書借月在先故據
以排印

思陵典禮紀卷一

宛平 孫承澤 著

崇禎上於丁卯八月二十四日登極。詔曰：我國家列聖，續承休烈，化隆俗美，累治重熙，遠垂萬禩。我大行皇帝仁度涵天，英謨憲古，勵精宵旰，銳意安攘，海宇快覩維新，疆土勤思恢復，萬機總攬，六幕禋庥，方啓鴻圖，忽賓龍馭，爰膺顧命，及予微躬，驚聞憑几之言，凜念承祧之重，而文武羣臣及軍民耆老，合詞勸進，至於再三，辭拒弗獲，乃仰遵遺詔，於八月二十有四日，祇告天地宗廟社稷，卽皇帝位，以明年爲崇禎元年。朕以冲人，統承鴻業，祖功宗德，惟祇服于典章，吏治民艱，將來宜於通變，毗爾中外文武之賢，諸子股肱耳目之用，光昭舊緒，愈懋新猷。

上爲皇五弟，諱由檢，于天啓七年丁卯二月初三日，以信王出邸成婚，諸臣朝謁，連日大風霾，是日忽朗霽，而上舉止非常，瞻者相顧歎異。三殿自萬曆丁酉燬，後至天啓八月二十日，工始粗畢，而是月二十四日，上登極臨御，儀制久疎，鴻臚茫然不知也。舊例，禮部堂上官侍班，史官導駕，科員殿班，御史先朝見于建極，而東西分侍之班未定。上袞冕已御建極矣，魏忠賢姪僞伯良卿奉遣南郊還入白，上曰：知道了。語頗震肅。又曰：百官免賀，免宣，禮部過跪承旨，訖各官行五拜三叩頭禮。六科起侍班候導駕，餘官卽趨出中極左右兩小門，循殿牆而馳。

從中極殿兩旁門入迎駕。六科導上從建極過中極。出御皇極。侍班官兩旁面駕一躬。距上咫尺。卽侍立。氈旁簾下。簾捲。上從中徑上九級御座。旁皆祖宗朝鎮器。烹廟時。每出必用羣瑞扶掖。上悉屏去。初時座旁尙立二大瑞。亦斥之下。天顏肅穆。侍臣加額稱慶。

崇禎登極。恩詔極渥。戊辰科新進士。皆于授官後。卽給誥勅。前此累朝未有也。按洪武至宣德六十八年間。登極立中宮。東宮及上慈闈尊號。徵號詔。皆無文武官封贈。蔭子試署實授恩例。至景帝後始有之。然猶及兩京文武官。未及外官也。至嘉靖十九年。皇子生。始有在外七品以上歷任三年無過者。與誥勅之恩。

恩詔各從其類。上慈闈徽號。則有封贈父母恩。立東宮。則有廢子入監恩。災異脩省。則有蠲逋減刑恩。登極則大赦矣。立中宮及東宮。出閣皆無恩例。若建大工。平大賊。誅大奸。亦有詔。皆以類行。惟蠲逋減刑。每詔有之。全在經濟有識閣臣主持之。恩不欲靳。亦不欲濫也。

卽位之賞。洪武時無之。自永樂以藩邸入紹大統。始有賜上自公侯。下及京軍監生。生員吏典坊廂民匠。俗道醫人樂工廚皂。皆有之。然不過在京文武吏兵耳。仁宗登極。徧及藩方。最爲優渥。自是不勝其費。崇禎登極。賞軍至用銀二百五十萬兩。每軍二兩。毛文龍海上之兵。僅數千。詭稱十五萬。領銀三十萬兩。崇禎丁卯八月二十三日。定紀元之號。閣臣以四號進。一曰乾聖。上曰乾爲天。聖則安敢當。二曰興福。上曰中興甚好。亦不敢當。三曰咸嘉。上曰咸旁爲戈。今方欲息干戈。勿用。四曰崇禎。始用之。遂頒行天下。

國朝列帝卽位。踰年改元。不再改。遵古道也。洪武三十一年戊寅閏五月。崩于西宮。皇太孫卽位。明年己卯。改元建文。又明年壬午六月。遜位于文皇。乃革建文年號。通稱洪武三十五年。英宗正統十四年己巳北狩。八月困於土木。以景泰八年丁丑春正月。自南宮復辟。改元天順。蓋與民更新。勢不獲已。豈與無因改元者例論哉。然張重華方臘俱號永樂。契丹號天順。西夏號正德。固不可爲嫌也。天啓則魏元法僧梁蕭莊南詔晟豐祐先已用之。又郭子章傳草續記萬歷間。予邑人掘地得一法馬。上鑿天啓三年造背有吉安路三字。予考天啓乃梁王琳立永嘉王蕭莊稱帝改元也。然時不稱吉安路。稱自元始。考太和舊志。至正戊戌。紅巾徐貞一陳友諒陷江西。下吉安。泰和稱天啓。則此法馬正其時物。觀此則天啓之號。前代已四見矣。

崇禎十五年壬午。元旦。上御皇極殿。百官朝賀畢。上下寶座。秉圭中立。命宣輔臣。左右誤以爲宣府臣也。五府勳臣至殿上。乃令之下。而曰宣閣臣。閣臣周延儒等疾趨而至。上嚮西立曰。今日元辰。朕在宮中拜天地。拜承先殿。始出御朝。先生每朕之師也。理當一拜謝教。遂西向長揖。延儒等跪伏在地。流涕滿面。時澤以科員導駕。感堯舜之再見。而愧臣工無以報塞也。

附紀事詩

闕門元日感咨囑。五色榮光動冕旒。一自丹書臨北面。更無龍袞揖東頭。天支大廈思隆棟。帝念巨川重濟舟。泰運只憑新禮樂。良臣何以答端求。黃虞曠典雅難倫。復有賡揚到比鄰。不謂保明初訪落。還從

遵帝得忱恂。元穹監物垂垂定。聖主敦庸事。幾代圖松當此禮。光風穆雨四門賓。師臣者帝古尊賢。況在宸居異講筵。七聖道南通大駟。八能占應奉階前。未須審象知惟肖。不待飄風賦有卷。十四朝來無故事。安昌口古序當年。星辰從此觀重華。勸爾聞昌卽拜嘉。縱賜千金猶有數。雖封百子又何加。碧磚長照交龍影。紗帽能添壓鬢花。新注起居人見少。各傳銀管照家家。

崇禎十五年七月初九日。爲常朝之始。臨時傳免輔臣具揭規正。上賜手勅褒嘉。

皇帝勅諭輔臣周延儒、陳演、蔣德璟、黃景昉、吳甦。朕以涼德纂服。昕夕靡敢荒寧。幾務殷繁。愆忘是懼。卿等盡心匡導。卽事贊襄。視國猶家。圖難於易。調和消彌。未易枚舉。卽如本月初九日。偶因微恙。暫免早朝。方愧宵衣。卽勤補牘。卿等忠純體國。念篤愛君。上攷典謨。惓惓於君要臣詳之義。深惟易傳。懇懇於晝勤夜靜之宜。意比韋弦。言同藥石。朕心忻悅。是用褒嘉。惟海宇當多事之時。而拮据賴克艱之佐。臣勞而君乃逸。內治則外自寧。卿等其益誨無方。匡朕不逮。糾虔如始。共保天和。欽哉。故諭。

上書法唐太宗。此諭尤秀勁。當時摹勒上石。

壬午閏十一月初七日。上諭二祖舊制。日嘗朝見羣臣。裁決政事。朕今率循成憲。除門朝照例應免日期傳免外。餘每日視朝畢。勳戚文武諸司等官。有欲奏事者。赴宏政門報名候召。不許內外官員口口敢有壅蔽阻當者。定以奸欺論斬。

常朝舊制。每日御門決事。萬歷初。以方在諒陰。聖躬幼沖。閣臣酌議。三六九日視朝。及二年五月。禮部

請復舊制。仍定三六九日。遂沿爲例。

大朝後殿看馬。其事始於世廟。久不舉行。崇禎壬申十一月初十日。冬至郊祀。次日。百官入賀。上受朝畢。更便服於皇極殿丹陛上設帳。羣臣盛服侍班。閱視御馬監馬匹。每一馬各有名牌。壯士控之。由東過西。是日閱馬三百三十三匹。雲錦成羣。真所謂天閑上駟也。

丁卯十月。上御文華殿日講。是日講大學一章。尙書堯典一章。帝鑑圖說一章。上退御便殿。以御書示閣臣。諸皆贊美。上曰。書有不如法者。卿等當爲改正。輔臣叩頭謝。按故事。日講官一員直講。一員直讀。直讀者先讀五過。上隨口讀已。方直講者進講。是日傳免進講。越三日。復傳免講。帝鑑圖說。講祖訓。通鑑。二書。丁卯十月。上御講筵畢。召輔臣黃立極等入便殿。出督師尙書王之臣疏示之。諭曰。朕覽王之臣疏。自稱贅員。又曰。虛拘。顯因內臣在彼牽制。不便行事。朕欲將各邊內鎮。盡行撤回。一切兵馬錢糧。着交割各督撫鎮道衙門。封疆事重。王之臣須一力擔當。卿等可擬勅諭來看。

崇禎元年戊辰二月癸丑。上初御經筵。以英國公張維賢。大學士施鳳來。充知經筵官。大學士張瑞圖等。充同知經筵官。侍讀學士溫體仁等十六員。充講讀官。編修倪嘉善等八員。充展書官。講堯典大學各一章。賜各官筵宴銀幣鈔錠有差。

元人經筵儀節悉備。國朝皆倣其制。元以勳舊大臣知其事。明初亦惟勳臣一人知經筵。後至李文達。始與勳臣俱知經筵。非初制也。

國初有弘文館。在大內之西。以處博學之士。正統初。選經筵。悉翰林官。

內批如何。不見居外賢良。以旨赴宏文館。於是劉球等。自部屬進。次經筵。

世廟時。祭酒陸深爲講官。言講官講章。不宜輔臣改撮。使得自盡其愚。熹廟初。李康先爲講官。亦言講官講章。宜徑達御覽。閣臣不得改易。

戊寅春。經筵講官王鐸。講聰明睿知一章。分疏敬信悅字。反詰太多。言時事又有白骨如林等語。講畢。上怒。謂其敷衍數語。支吾了事。全不能發揮本義。王出案前。待罪良久。上命起來。又忘謝恩。其次講尙書者。乃黃錦。聲細而哀。無一字可辨。上不憚而罷。

辛未。羅喻義送講章于閣。烏程溫輔令改不肯。遂至參疏。言舊例。惟經筵進規。多于正講。日講則正講多。進規少。今喻義以日講而用經筵之例。駁改不聽。自愧不能表率後進等語。乃下部議處。部議云。聖聰天縱。而喻義曉曉多言。遂以閒任處之。講章原無定例。體仁特借以除異己耳。而部之詭隨。可鄙矣。

上不喜忌諱。一日講春秋。越過宰咺來歸仲子之賵。蓋諱贈字也。上令補講。至疾病二章。從來不以進講。上皆命補講。其時王錫袞爲講官。乃以天字立義。言聖與天通。無論生死疾病。無往非天。故曰吾誰欺。欺天乎。其論甚佳。一日王錫袞講禹吾無間然章。進規處略去各項。獨重溝洫。言江南水利極其詳盡。上頓耳聽之。

庚辰八月十二日。當開經筵。而初四日。廷杖詞臣黃道周。初十日。又杖救道周者戶部主事葉廷秀。上意

弗懌。改期二十二日。又係憲宗熹宗忌辰。鴻臚寺請用青錦繡。上改二十三日。

崇禎壬午八月。經筵勅諭。朕惟帝王圖治。必以務學爲先。蓋敬怠總握於君心。而法戒備彰於古訓。講學勤政。相須尙矣。我祖宗神聖御天。率隆斯軌。朕用遜志。罔敢荒寧。爰自元年。講筵肇舉。於今十有五載。方以明微經義。實裨治理。爲儒臣勗。乃至宥密之地。彌資啓沃之功。茲特命太傅成國公朱純臣。少傅兼太子太傅吏部尙書建極殿大學士周延儒。知經筵事。禮部尙書兼翰林院學士林欲楫等。充經筵講官。於戲終始典大學士蔣德璟。黃景昉。吳牲。同知經筵事。禮部尙書兼翰林院學士林欲楫等。充經筵講官。於戲終始典於學。克建赫濯之猷。緝熙單厥心。爰迓飯章之福。自古帝王之學問。非徒文字之敷陳。其道在知人安民。其本則正心誠意。脈絡雖遠。綱領可尋。朕每寤寐三王。表章六子。間沿今以迺古。而實效尙稽。卽因理以求心。而精義未晰。卿等學在經世。志矢格君。尙其深研危微。明陳標本。以及人才國是。吏治民生。一切安內治外之圖。務求制勝保邦之要。各殫忠藎。弗騁繁華。俾嘉言得見。諸施行。而上理可追於隆古。予一人實嘉賴焉。欽哉。故諭。

壬午九月二十五日。諭禮部。經筵大典。禮宜嚴肅。以後定於辰時行。供事各官。照日講例。著文書官預傳站班。不得參差遲誤。該部卽行傳飭。故諭。

壬午八月。上御文華殿日講。故事。經筵有二案。一在御前。一在講官前。俱有講章。而日講則止一御案。第以經書置案上。講官指書口講。無講章也。講官韓四維。屢次遺忘。上以於凜寬之。先數日。上諭輔臣。日講

可照經筵例。亦置講章。朕有所疑。可據以問難。而講官亦不至遺忘。因具揭帖進呈。上卽批發。令傳與講官知。是日遂用講章。在御前用牙簽指講。

壬午九月十八日。上日講。講官講論語子罕言一章。書旅獒。春秋大水。孟子北宮黝節。上召輔臣前問。夫子論仁。如欲立欲達。克己復禮。天下歸仁。及出門使民等語。言仁儘多。何云罕言。輔臣延儒對曰。此卽性與天道不可得聞之意。德璟對曰。聖人未嘗不言仁。只門弟子悟者以爲言。不悟者以爲罕言耳。又問命與仁如何分別。德璟對曰。總一理在天爲命。在心爲仁。上首肯。又問一日克復。天下歸仁。便是修己以安百姓意思。輔臣極贊。以爲聖見明徹。吳姓曰。帝王學問。總只是明德新民。德璟曰。明明德於天下。便是天下歸仁。頃之上曰。近來雨暘時若。秋令甚佳。輔臣因及起廢事。公薦葉廷秀成勇最有清望。上頷之。次日上手諭。昨先生等論仁諸說。深當朕心。著卽撰寫進呈。以便觀覽。

崇禎三年二月初十日。冊立東宮。詔曰。朕惟自古帝王。嗣大歷服。長治久安。莫不首重建儲。所以定宗祚。隆國本。凝天眷。而繫人心也。我祖宗列聖相承。德祚綿洽。率由茲道。以裕詒謀。朕祇紹丕基。兢懷付託。乃荷穹眷。祐嗣早開。長子慈烺。容託坤元。祥鍾震一。中外起敬承之頌。天人表協應之符。昨者文武臣民。疏稱再三。舉行冊禮。而朕以子方襁褓。謙讓未遑。茲屆青陽載仲之辰。正值蒼巽誕彌之月。禮官復申前請。衆志誠難固違。爰考舊章。式諏吉日。祇告于天地宗廟社稷。冊寶立慈烺爲皇太子。以仰繩奕葉無疆之緒。俯慰兆民胥戴之情。大典告成。寰垓同慶。

元年二月初四日皇太子生詔曰朕惟帝王膺天歷而奉宗祧首重元儲尤隆世嫡朕以涉躬嗣位丕基祇念我皇祖皇考集慶發祥源深緒遠佇昌嗣續仰慰詒謀茲荷上帝居歆宗祫垂祐以今年二月初四日第一子生係皇后周氏出中閨開家嫡之先萬國愜元良之祝肆頒渥澤覃被多方

崇禎十年丁丑禮部請太子出閣講讀是時太子九歲矣上定明年二月遂以戊寅正月冠二月初七日出閣太子冠禮三加初折上市二遠遊冠三九旒冕

崇禎己巳二月初四日巳時皇長子生先是黃御史疏糾周侍郎延儒上震怒欲廷杖之是日之早傳召侍郎及御史來文華殿上將出俄報皇長子生遂撤諸人甚爲侍御賀

壬申八月十五日皇三子生十七日上御門受賀百官吉服五拜三叩頭而出按會典俱御殿百官朝服禮部尙書黃汝良爲萬歷二十五年例止御門及百官吉服然皇長子及三子皆中宮所生當與嬪妃不同是日上翼善冠簪金花二枝長子名慈烜三子名慈炯卽定王也

崇禎三年冊封皇太子設座于文華左門南向具童服迎節至十一年始行冠禮

崇禎十五年八月東宮端敬殿開講輔臣恭議增定講儀

一覽史以佐經察舊儀有讀四書講經史之文似宜於經書外每摘簡要通鑑一段進講于凡治亂邪正是非之際詳細開陳庶以古鏡今爲益不小

一省讀以進業舊儀經書各讀十編爲蒙養聖功伏見皇太子聰穎非常似可省爲五編以餘力用之

閱史作對。既可養氣。兼可旁通。

一對句以致知。相傳祖宗朝講讀畢。皆有對偶之句。由淺入深。由近及遠。比物連類。觸發頗多。似可將舊對佳者。集爲一帙。恭候東宮時取覽觀。間作一對。容臣等與侍班講讀官互相參叩。似亦格致一助。一問辨以去疑。聞高皇帝每令儒臣進講。必令反覆討論。以求義理之極。如講洪範立政。講攻乎異端。及心箴。皆直闡聖真。出自天悟。至肅皇帝聽講。尤多前賢所未發。皇上精洞古今。同符二祖。計萬幾之暇。所以諭東宮者。耳提面命。無不周到。而講官進講時。間有疑義。東宮亦可時賜詰問。以盡下情。一時習以基聖。先臣詹事吳寬言。東宮講學。自寒暑朔望令節外。一歲之中。不過數月。一日之內。不過數刻。況其間又多間歇。卽曰習講。于內終不若出就外傅。親近儒臣。講習治道。所得爲多也。商書言終始典學。周頌言日就月將。皆守成芳躅。謹舉以爲時習不厭之助。

崇禎壬午十月十七日。上日講畢。與輔臣議東宮事。因出黃匣內欽定官屬約八條。離間親親。交結有司。誑嚇給誘。擅作威福。言動非禮。關防欠肅。內外宜別。出入當謹。以示輔臣。皆御筆也。輔臣延儒奏曰。戒飭官屬。是內是外。上曰。是內員。此朕親經歷的。向朕在慈慶宮後面。勗勤宮住。極知此輩情弊。專行離間。朕朝皇兄熹宗。並不交接一言。先帝樸實。被他蒙蔽。上不覺茫然。延儒曰。關防內外。未知如何。上曰。就內言。內員就是外了。延儒曰。東宮有女人服事否。上曰。向前也撥兩箇婆子。德璟奏曰。要年高六十歲的。上曰。宮中法度嚴。他也不敢。德璟曰。伴讀及典璽也要緊。上曰。典璽田存善也還好。未知其心如何。東宮後來

卽位。此輩便是從龍之人。是時方有選嬪之舉。又東宮年當選婚。故移宮已卜于本年十月二十七日。德璵以爲天氣方寒冷。吳姓曰。天氣正寒。稍緩何如。上欣然曰。卽俟二三月亦不妨。

皇太子端本宮。在東華門內端敬殿之東。左爲東華門。右爲文華門。光宗皇帝青宮時所居挺擊之地也。天啓末。懿安張皇后移居於此。名慈慶宮。其外爲徽晉門。崇禎壬午八月。懿安移入仁壽殿。因改爲端本宮。徽晉門改爲前星門。內左右門改爲麟趾門。燕翼門。第二門原名麟趾門。改爲重暉門。第三門慈慶門。改爲端本門。左右純禧門。改爲養正門。體元門。改宮後泰寧門爲凝慶門。以待東宮大婚。未幾罷選嬪之議。竟未移居。

崇禎十四年五月。內閣傳奉聖旨。朕第三子年已十齡。敬遵祖制。宜加王號。但旣受冊封。必具冕弁翼善冠服。而會典開載年十二或十五始行冠禮。而十齡受封。已加冠矣。有無妨礙。卿等傳示該部。詳察典則。經禮一併議擬具奏。隨該本部覆題。奉聖旨。這先封後冠。旣詳察經禮。不相妨礙。今歲冊封皇三子。照例具服舉行。至十二歲行三加禮。該部卽將冊封事宜。詳具儀注。擇吉來看。欽天監選擇本年八月十一日辰時。及二十五日巳時。上定二十五日舉行。翰林院撰擬王號。蒙欽定爲定王。至期以皇三子偶有小恙。改九月十八日卯時舉行。十二日。舊輔周延儒賀逢聖。應召到京。十三日見朝召見。中左門賜坐。命卽入閣。遣二臣行禮。十八日。上以冊封定王。告於奉先殿。遣官奉節冊寶置綵輿。至王宮門外。王具服出迎。王隨至拜位。四拜宣冊寶。王受冊寶訖。以授內官。捧置冊寶案。王四拜禮畢。內臣捧節。由中門出。王送出宮。

門外內官以節授正副使報禮畢。是日內官引王詣奉先殿行謁告禮如常儀。畢詣乾清宮。皇上服皮弁服。皇后亦具服。各陞座。王行八拜禮。詣皇祖宜懿惠康昭妃前。皇考溫定懿妃前。皇兄懿安皇后前行八拜禮。詣皇貴妃前行四拜禮。詣太子前行四拜禮。次日免朝。命定王從弘政門出。皇極門前東廡坐。百官吉服行四拜禮。

崇禎十五年三月二十一日。冊立永王。其禮同。制曰。朕恭繹祖武。仰席天休。長發其祥。幸本枝之昌後。封建厥福。宜茅土之流榮。誼既篤於展親。典益隆於啓宇。咨爾皇四子慈炤。賦性岐嶷。育德溫文。璇極分輝。式謹庭趨之教。蓼樓儷秀。具凜藩序之恭。朕稽古昔。衆建維城。而剖封必冊。拜於廟。彝章具在。寵命宜均。是用封爾爲永王。錫爾介圭。以作爾寶。於戲。周書之命康叔。敬典在乎乂民。漢史之頌東平。問樂莫如爲善。惟孝以永言垂則。惟福以永配爲求。爾尙克戒怠荒。無忘忠孝。保茲帶礪。以鞏皇圖。體朕訓言。用膺多祜。欽哉。定王中宮周皇后出。崇禎辛巳封。年方十歲。壬午正月出閣。永王東宮田貴妃出。以壬午封。亦十歲。癸未八月出閣。皆命吏部選新進士爲簡討。國子助教等官爲侍詔。充講讀。以兩房兩殿中書充侍書。每遇出講。則王從皇極門左宏政門出。紅板轎。用校尉八人。青羅小傘二柄。輿至尊同。而隨侍內璫皆金帶也。王至皇極門下。輿趨過西。復上輿。趨書堂階下。出輿。閣臣率講讀侍書官立于門右。一躬俟王入書堂。至先師前行禮畢。出坐堂中。王命先生輩來一躬。卽分班內門。內閣臣左立。餘各官稍退。分左右立。一躬出班。初開館行四拜禮。以後行一拜禮。不叩頭也。讀四書書經各五遍。講四書書經各二遍。王命先生

每喫酒飯。卽出用酒飯畢。再入侍。王寫做。閣臣至案前環觀。王親寫十餘字。俟諸臣退後。寫足送閣。閣中批圈畢進呈。

皇極門外兩廡四十八間。除曠八間外。實四十間。東二十間。爲實錄玉牒起居諸館。及東閣會坐公揖處。西二十間。上十間爲諸王館。下十間則會典諸館也。定王書堂在西第六間。爲讀書處。第五間。懸先師孔子畫像。四配侍側。蓋摹吳道子筆也。及永王出閣。因移定王第四間。而永王在第六間。王初出閣。向先師行四拜叩頭訖。以後則行一拜三叩頭禮。皆內官贊禮。第三間第七間爲二王退居處。案上置四書書經句文。及集註大學章句或問。洪武正韻海篇直言諸書。皆紅綾殼。